

Biblioteca Nacional Aruba ta trece

Otro edicion di Proyecto Conta cuenta na Casnan di Anciano



ORANJESTAD (AAN); Na biblioteca bibliotecarianan ta cla cu e organizacion di un otro edicion di e proyecto anual Conta cuenta na casnan di Anciano. E proyecto lo worde ehecuta entrante april. E proyecto Contamemento di cuenta pa nos grandinan ta un proyecto cu e meta pa stimula lesamento y contamento di storia. Bibliotecarianan di Biblioteca Nacional Aruba hunto cu autornan local y poeta ta bishita e casnan di anciano y ta presenta un programa di 1 ora cada siman.

E programa ta varia cu contamento di cuenta, declamacion di poesia y na final ta pasa un documentario cortico. E proyecto tin un duracion di 3 luna.

Diahuebs awor, dia 4 di april señora Frida Vrolijk ta cuminsa cu su presentacion na Maris Stella na Savaneta. Señora Frida Vrolijk ta duna 4 presentacion. Na mei señora Ruthy Vrieswijk-Bergen ta duna 4 presentacion na diferente cas, sigui pa sr. Roberto Croes cu ta duna diferente presentacion na juni.

Señora Frida Vrolijk tin

hopi aña ta skirbi poesia, haiku y cuenta y e tin hopi aña ta presenta su publicacionnan. Pa señora Vrolijk e ta un gran placer pa por declama pa hende grandi. Riba su mes, dos bes pa siman e ta bishita grandinan pa declama, conta storia, toca cuarta y canta.

Frida, pa su presentacion, ta conta e storia titula 'E kabouternan chikito y sapate'. E ta declama e poemanan 'Bandera "Aruba dushi tera"', 'nos cultura', 'Mama tera'. Despues e ta toca riba su cuarta y ta canta 3 cantica titula 'Don Pancho Pica flor', 'Alabre' y por ultimo "Nos Arubianonan".

Despues di e presentacion di Frida ta pasa un documentario cortico cu un tema di cultura di Aruba of historia di Aruba. Esaki ta un produccion di Servico Audiovisual di Biblioteca. door di wak e documentario di un faceta di historia cultural di Aruba hopi recuerdo lo bin ariba cu por comparti. Otro meta di e proyecto aki ta pa yuda tene e habitantenan di e casnan socialmente activo banda di promocion di lesamento.



**Telefonnan di
DIARIO 582-6747
Fax 582-8551**